



DISCURSU MANIFESTACIÓN LLETRES ASTURIANES 2025

Munches gracies por volver tar na cai, nesta plaza, al llamáu de la Xunta pola Defensa de la Llingua Asturiana. Gracies por salir a reivindicar la oficialidá nestes feches de celebración pa les lletres asturianas.

Son tiempos complicaos los que tamos viviendo, pero, por eso mesmo, ye más importante que nunca caltenese xuntes na reivindicación, sollertes na llucha y concentraes nos oxetivos de la oficialidá y los derechos llingüísticos.

La oficialidá vuelve tar enriba la mesa de la Xunta Xeneral cola reforma del nuestro Estatutu d'Autonomía, como tuvo en llexislatures anteriores. Tien que ser razón d'arguyu pa tol movimientu reivindicativu qu'una y otra vuelta seyamos quién a llevar esi debate a les nuestres instituciones democrátiques: el debate sobre la marxinación y la falta de derechos que carecen les persones falantes de les llingües propies d'Asturies, asturianu y gallego-asturianu. Por muncho que quieran inoralo, tapalo o aplazalo, esta ye una llucha que percuere en paralelo la historia democrática d'Asturies y que namás va poder iguase nun horizonte d'igualdá llingüística plena.

Nesti procesu de reforma estatutaria, aunque nun cuaye, na Xunta Xeneral va demostrase qu'hai una mayoría rotunda a favor de la oficialidá. Por desgracia, nesto la derecha asturiana vuelve dir de la manina colo peor de la intolerancia y la reacción ultra. Los votos de la negación van torgar lo que va años tenía que tar llograo y resuelto.

Nun hai que s'engañar. Vivimos tiempos escuros onde la llocura de la extrema derecha nun tien problema en dicir la solución que pensaron pa les nuestres llingües y los nuestros derechos. La d'ellos diba ser una solución final, l'acabación de tolo que fomos, quiximos y fuimos quién a crear y imaxinar como pueblu arguyosu del so patrimoniü llingüísticu.



Frente a esto hai que llevar barricaes tolos díes, nel llabor diariu de tola xente que tais equí. En casa, en trabayu, nos medios, na escuela, pa que nun faigan desaparecer l'asturianu o'l gallego-asturianu en nengún contestu. Y tamién hai qu'entamar actos reivindicativos como ésti que demuestren que seguimos equí y, tamién, que nun nos dexamos engañar. Porque, munches veces, los mesmos que dicen defender nes instituciones la oficialidá son los que depués nun faen nada nos espacios onde se pue visibilizar l'usu normal de les nuestres llingües y onde se puen asegurar derechos.

Sobre manera, la situación na enseñanza y nos medios de comunicación nunca se ve qu'ameyore. Vivimos instalaos nos años 80 de contínuu. La marxinao y el voluntarismu siguen siendo lo único esperable nesos ámbitos que, nos sitios civilizaos, foron la vanguardia de la recuperación de les llingües propies y que, col reconocimientu de derechos, foron a tornar la situación de perda llingüística y favorecieron la tresmisión interxeneracional del idioma.

N'Asturies paez que quieren que nos conformemos col usu ritual del asturianu, namás en fiestes de guardar. Ye abondo con mirar pa la programación de la RTPA d'esta Selmana de les Lletres. Anuncia toa arguyosa que nes noticies va informar n'asturianu sobre los actos de la Selmana, como un regalín. Pa completalo, desempolven tolo que tienen nos armarios de va años y vuelven emitilo otra vez más. Y asina tolos años. Pero namás qu'acaba la fiesta, yá vuelve la normalidá: vuelven les noticies en castellanu y vuelve una programación n'asturianu curtia, testimonial, onde munches veces namás apaec nos títulos o na presentación. Esi ye'l papel de la nuestra radiotelevisión pública. Llevamos años y años denunciándolo, y los responsables políticos, toos, siguen dexando qu'eso siga asina cuando tenía que ser una de les ferramientes fundamentales de la proyección y impulsu d'Asturies, les sos llingües y la so cultura.



L'usu ritual del asturianu tamién lu vemos caldía en partíos, en sindicatos, en plataformes, n'asociaciones... Esi "respetu" que lleva a falar too en castellanu, pero dicir "Asturies". Que lleva a escribir un mensaxe en castellanu, pero amestar depués, por si daquién tien gana de lleelo otra vez, una versión nun asturianu torpono y malcurioso, fecha con traductor automáticu. Y habrálu que diga: ¡Nun vos quexar, qu'agora tenemosvos en cuenta! Traguemos el marcu discursivu de qu'hai que respetar que daquién se pueda ofender por vese obligáu a lleer un testu n'asturianu, traguemos que n'Asturies l'asturianu nun s'entiende y precisa d'una traducción al llau. Yá veis, agora acéptennos como llingua de compañía, como adornu políticamente correctu.

Pero equí tamos. Equí seguimos un montón de xente qu'aguanta, que caltién la llealtá llingüística y la reivindicación. Con esti panorama social y políticu nun nos queda otro que'l compromisu individual y la movilización colectiva. Tenemos que-yos dexar bien claro que nun vamos parar. Que si lleven a votación la oficialidá pa quitalo de delante rapidino, vamos volver pidir una reforma estatutaria al otru día. Cada minutu que pasa ensin oficialidá ye una llaceria pa los valores democráticos n'Asturies y pa la sobrevivencia del nostru patrimoniu llingüísticu.

Va unos díes recordemos nun actu n'Avilés la vida y el llabor del compañeru Damián Barreiro, col que tuvimos la suerte de tar años coldu con coldu na reivindicación d'una Asturias más digna y meyor. Vamos seguir el so exemplu, un exemplu de trabayu y de compromisu pa que caún pueda vivir y falar na llingua que quiera, y pa que lo pueda facer en llibertá y con tolos derechos.

¡L'asturianu, llingua oficial! ¡Yá, yá, yá, oficialidá!